

Pantulan semula pasaran saham cermin suasana perniagaan kukuh – Najib

KUALA LUMPUR 5 Dis. – Pantulan semula pasaran saham mencerminkan suasana perniagaan yang masih utuh di negara ini, kata Timbalan Perdana Menteri Datuk Seri Mohd Najib Abdul Razak.

Beliau berkata, dasar ekonomi makro yang pragmatik dan tepat pada masa mengukuhkan asas ekonomi Malaysia dan menambah baik sentimen pelabur.

Senario ini dicerminkan oleh prestasi Indeks Komposit Kuala Lumpur (KLCI) yang melepasi paras 1,000 mata baru-baru ini, kata Najib dalam ucapan perasmian-nya di Persidangan Tinjauan Ekonomi Negara MIER 2007-2008 di sini hari ini.

Ucapannya dibacakan oleh Menteri di Jabatan Perdana Menteri, Datuk Seri Mohd. Effendi Norwawi.

KLCI ditutup pada 1,087 mata semalam.

Timbalan Perdana Menteri berkata, ekonomi Malaysia perlu terus berdaya tahan ketika berdepan dengan keadaan ekonomi global yang semakin mencabar.

“Teras utama dasar ekonomi makro pada 2006 dijangka meningkatkan daya saing dan daya tahan Malaysia di samping memastikan pertumbuhan berkualiti terus dilaksanakan.

“Pragmatisme, keabadian dan fleksibiliti penting kepada keperluan ekonomi yang sering berubah-ubah untuk menangani cabaran global dan domestik,” katanya.

Dua perkembangan utama pada tahun 2006, adalah pelancaran Rancangan Malaysia Kesembilan (2006-2010) dan Pelan Induk Perindustrian Ketiga (2006-2020).

Kerajaan, bagi bahagiannya pula akan

UM - 6/12/2006
terus mengamalkan pengurusan kewangan berhemat dan memberi lebih tumpuan kepada meningkatkan kecekapan, keberkesanan dan pertanggungjawaban dalam perbelanjaan awam, katanya.

Dengan sokongan pertumbuhan sektor swasta kukuh dan pendapatan berkaitan minyak yang tinggi, rangsangan fiskal aktif tidak dijangka melemahkan usaha-usaha pengukuhan belanjawan.

Defisit fiskal kerajaan dijangka turun kepada 3.5 peratus pada 2006, tahap yang akan merangsang pertumbuhan ekonomi tanpa mengenakan tekanan ke atas bajet kerajaan.

“Sektor swasta akan terus menjadi pemacu utama kepada pertumbuhan Malaysia,” katanya.

Ekonomi Malaysia dijangka mengekalkan momentum pertumbuhannya pada tahun 2006, disokong oleh permintaan domestik yang pesat dan pengembangan eksport yang menggalakkan.

Keluaran Dalam Kasar Negara diunjur berkembang sebanyak 5.8 peratus tahun ini dan 6.0 peratus pada 2007.

Sepanjang tempoh RMK-9 (2006 hingga 2010), pertumbuhan ekonomi disasar pada 6.0 peratus setahun, kata Najib.

“Sebagai peringatan, terdapat risiko menurun kepada prospek pertumbuhan Malaysia. Ketidakeimbangan global seperti yang dicerminkan dalam defisit akaun AS yang besar, boleh membawa penurunan besar dalam dolar AS,” katanya.

- Bernama